

Giaman bilip em i samting nogut tru.

Moning.

Sampela manmeri i tingim olsem, i no bikpela samting long giaman long ol samting bilong bilip. Sampela bilong ol i tok olsem, "Mi bilipim na trastim Jisas." Em olsem tasol ol i stap yet long jelas pasin na selfis pasin na giaman pasin. Ol i stap yet long olupela pasin bilong ol. Ol i stap yet long pasin bilong dispela graun. Wanpela senis bilong trupela bilip i no *stat* long kamap long laip bilong ol.

Na i gat ol sampela manmeri i save giaman long bilip *bilong* amamasim ol waitman na ol misineri na ol bikman bilong sios. Long antap skin ol i mekim ol gutpela toktok long ol samting bilong bilip, tasol ol i mekim *bilong* kisim ol kago samting long han bilong ol waitman na ol misineri *na bilong* kisim biknem long ai bilong ol manmeri.

Sapos yu tingim olsem pasin bilong giaman long bilip em i no samting nogut, orait yu mas skelim stori bilong Ananias na Safaira. Lukim **Aposel 5:1-11**....

¹Tasol narapela man Ananias, wantaim Safaira meri bilong em, em i bin salim wanpela hap graun na kisim mani, ²na em i haitim hap mani na putim i stap bilong em yet, na meri bilong em i orait long dispela pasin. Em olsem na Ananias em i karim hap mani tasol i kam long ol aposel. ³Tasol Pita em i tok, "Ananias, olsem wanem Satan i pulimapim tingting bilong yu long giamanim Holi Spirit na yu haitim hap mani na putim i stap bilong yu yet?" ⁴Taim graun i stap yet long han bilong yu, orait em i graun bilong yu yet. Na taim yu salim graun bilong yu na kisim mani, orait dispela mani em i mani bilong yu yet. Em olsem na, long wanem as yu kisim tingting nogut na yu giaman long dispela mani? Harim. Yu no mekim giaman long ol man. Nogat. Yu mekim giaman long God." ⁵Taim Ananias i harim dispela tok em i pundaun na em i dai pinis. Na bikpela pret i kamap long olgeta manmeri i harim stori bilong ol dispela samting. ⁶Ol yangpela man ol kirap na ol i pasim bodi bilong Ananias long laplap na ol i kisim em i go na planim em. ⁷Long 3-pela aua bihain, meri bilong Ananias em i kam, tasol em i no save long dispela samting i kamap long man bilong em. ⁸Na Pita i askim em, "Dispela mani Ananias i bin givim mipela, em i olgeta mani bilong graun bilong yupela o sampela mani moa i stap?" Na meri i tok, "Yes, em i olgeta mani bilong graun bilong mipela." ⁹Tasol Pita i tokim em, "Olsem wanem yu bin tok pas wantaim man bilong yu bilong traिम Spirit bilong BIKPELA? Lukim! Ol man i bin planim man bilong yu, ol i kam nau long dua, na ol bai karim yu tu i go." ¹⁰Na wantu meri em i pundaun klostu long lek bilong Pita na em i dai pinis. Ol yangpela man ol i kam insait na lukim meri em i dai pinis na ol i kisim em i go na planim em klostu long man bilong em. ¹¹Na bikpela pret i kamap long olgeta manmeri bilong sios na long ol manmeri i harim stori bilong ol dispela samting.

Yumi skelim 3-pela samting bilong Ananias na Safaira....

1. Tupela i no gat gutpela tingting, tasol ol i laik ol manmeri i *tingim olsem* tupela i gat gutpela tingting.

Taim tupela i salim graun bilong tupela yet, orait tupela i *haitim* ol sampela mani bilong graun bilong tupela, na tupela i kisim *hap* mani i kam long ol aposel. Na tupela i tok dispela *hap* mani em i *olgeta* mani bilong graun. Yu save, tupela i laik ol aposel na ol manmeri i *tingim olsem* tupela i kisim olgeta mani i kam. Tupela i laik ol aposel na ol manmeri i *tingim olsem* tupela i gat gutpela tingting. Tupela i laik ol aposel na ol manmeri i *tingim olsem* laip bilong tupela i senis.

Ol manmeri i kisim na holim trupela bilip long feiftul wok bilong Jisas, ol i kisim *gutpela tingting* na wanwan bilong ol i salim graun bilong ol na ol i givim mani long ol aposel. Ol i laik *helpim* ol nupela brata na sista

bilong ol na ol i salim graun na ol i givim mani long ol aposel. Tasol Ananias na Safaira tupela i no kisim gutpela tingting bilong helpim ol olsem. Nogat. Tupela i laik kisim biknem tasol, olsem na tupela i laik ol manmeri *i tingim olsem* tupela i gat gutpela tingting.

2. Tupela i mekim giaman bilong karamapim pasin bilong tupela.

Taim Pita i askim Safaira olsem, “*Dispela mani Ananias i bin givim mipela, em i olgeta mani bilong graun bilong yutupela o sampela mani moa i stap?*”, orait Safaira i bekim olsem, “*Yes, em i olgeta mani bilong graun bilong mitupela.*” Pastaim Ananias i giamanim ol aposel wantaim ol manmeri i kisim na holim trupela bilip, na bihain Safaira i giamanim ol tu.

Tupela i gat tingting nogut na tupela giaman long mani tupela i kisim i kam long ol aposel. Tupela i laik ol aposel na ol manmeri *i tingim olsem* tupela i gat gutpela tingting. Laip bilong tupela i no senis, tasol tupela i laik ol manmeri *i tingim olsem* laip bilong tupela i senis. Em olsem na, tupela i mekim giaman bilong karamapim pasin bilong tupela.

3. Tupela i daunim God na daunim Holi Spirit na daunim Jisas.

Long **lain 3** na long **lain 4** na long **lain 9** Luk (man i raitim buk Aposel) em i tok olsem, Ananias na Safaira tupela i *giamanim Holi Spirit*, na tupela i *mekim giaman long God*, na tupela i *traim Spirit bilong BIKPELA, Spirit bilong Jisas*. Ating tupela i tingim olsem, i no bikpela samting long giamanim Holi Spirit, na i no bikpela samting long mekim giaman long God, na i no bikpela samting long traim Spirit bilong BIKPELA Jisas. Ating tupela i tingim olsem, God na Holi Spirit na Jisas em i no bikpela samting tumas, na bilip em i samting nating tasol. Long dispela tingting bilong tupela, na long dispela pasin bilong tupela, tupela i daunim God na daunim Holi Spirit na daunim BIKPELA Jisas.

Ol brata na sista, yumi mas save gut long pasin bilong Ananias na Safaira. *Tupela i giaman long bilip*. Long antap skin *i luk olsem* tupela i kisim na holim trupela bilip wantaim ol aposel na ol femili bilong God. Tasol nogat. Olpela bel bilong tupela i stap yet na tupela i tingting strong tasol long mani bilong tupela na long kisim biknem tasol long ai bilong ol manmeri. Tupela giaman tasol long bilip bilong tupela.

God i hetim ol dispela kain pasin. God i hetim giaman bilip. Na samting God i mekim long Ananias na Safaira i soim yumi hetim bilong God long giaman bilip namel long femili bilong God. Em olsem na yumi no ken i tingim olsem God bai i stap nating na Em i no inap egensim manmeri i mekim giaman long bilip.

Lukim **lain 11**. “*Na bikpela pret i kamap long olgeta manmeri bilong sios na long ol manmeri i harim stori bilong ol dispela samting.*” Ol manmeri i kisim na holim trupela bilip, taim ol i lukim ol samting i kamap long Ananias na Safaira, orait ol i pret. Na ol manmeri autsait long sios femili bilong God ol tu ol i pret.

Dispela kain pret em i gutpela pret na yumi tu i mas kisim pret olsem. Dispela kain pret em i ken i helpim yumi *tingting stret* na yumi no stap nating na mekim giaman long bilip bilong yumi. Dispela kain pret i ken i helpim yumi *skelim bilip bilong yumi* na yumi kisim na holim strong trupela bilip long feifful wok bilong Jisas. Long *dispela rot* yumi bai lusim giaman pasin, na yumi brukim skru, na yumi askim God long fogivim sin bilong yumi, na trutru yumi bilipim na trastim God long kisim bek yumi long feifful wok bilong Jisas tasol. Na yumi lukim trupela senis i stat long kamap long laip bilong yumi.

Glenn.

Sapos yu laik save moa long dispela tok, orait yu lukim Aposel 5:1-11 long *Autim Tok* long www.pngbiblesources.org.